

Akiitsunut aningaasaliinissamullu pilersaarutit naapertorlugit Tasiilami mittarfiliornis-samut periarfissaqarsinnaaneranut atatillugu misissueqqaarnerit tullianilu businesscase aallarteqqullugit Naalakkersuisut peqquneqarnissaannik Inatsisartut aalajangiiffi-gisassaattut siunnersuut. Misissueqqaarnerit naammassineqareersimassapput ukiumi aningaasaliiffiusumi 2015-mi timmisartunut suluusalinnut mittarfiliornierup pilersaa-rusiornera aallartinneqarsinnaaqullugu.

(Palle Christiansen, Demokratit)

Akissuteqaat

(Peqqissutsimut Attaveqarnermullu Naalakkersuisoq)

Siullermeerneqarnera

Aalajangiiffigisassatut siunnersuummut saqqumminneqartumut Palle Christiansen qutsa-vigaara.

Tasiilami mittarfiliortoqarnissaa pillugu Assartuinnermut Isumalioqatigiissitap isumaliu-tissiissutaani inassutigineqartut, kiisalu illoqarfimmi takornariaqarnerulernissaanik takorna-riaqarnermik inuussutissarsiorlut kissaateqarnerat siunnersuutikkut taperserineqarput. Taa-maammatt Tasiilami mittarfissaq pillugu suliap aallartinneqarnissaanik Demokraatit kissaate-qarnerat Naalakkersuisut paasisinnaalluarpaat.

Taamaakkaluortoq Tasiilami mittarfissap pilersaarusiornissaata mittarfeqarnerup iluani ineri-artortitsinissamut ataatsimoortumik pilersaarummut ilanngunneqassasoq Naalakkersuisunit nalilerneqarpoq. Taamaammatt mittarfeqarnerup iluani nuna tamakkerlugu immikkoortunut pilersaarusiortoqarnissaanik suliamik Naalakkersuisut aallartitsisimapput. Tamatumani nunatsinni mittarfiit qanoq ineriartornerannut ataatsimoortumik naliliinerit ilaatigut ilaatinneqassapput. Immikkoortunut pilersaarummi mittarfeqarnerup iluani sanaartornermut annertunerusumik aningaasaliisoqassanersoq takuneqarsinnaalissaaq, sorlernilu sanaartorto-qassanersoq, sorliillu siulliunneqassanersut pingaarnersiorneqarsinnaalerlutik. Immikkoortu-nut pilersaarut massakut mittarfeqarnerup iluani periuserineqartuni, Naalakkersuisullu Qaqortup Kujataani qitiulluni mittarfeqarfiunissaanik aalajangernerannik aallaaveqarpoq. Sulinermi Assartuineq pillugu Isumalioqatigiissitap inassutigisimasai soorunami ilanngunneqassapput. Immikkoortunut pilersaarutip pigilernerani inassutigineqartut maanna pingaarnersiorneqalerput, allilerinissamullu periarfissat tigussaanerulerlutik. Immikkoortunut pilersaarummi innuttaasut qanoq amerlatiginerinit, katitigaanerinit, agguataarnerinullu ineriartortoqarnera, inuiaqatigiinnilu qanoq nuttartoqartiginera, kiisalu 2013-imut Aningaasaqarnikkut Ingerlatsineq pillugu Nalunaarummi allaaserineqarlutik inuiaqatigiinnut aningaasaqarnerup iluani kingunerisassanut naliliinerit pingaartinneqassapput.

Immikkoortunut pilersaarut aqutugalugu innuttaasut aningaasaataasa pitsaanerpaamik aqunneqarnissaasa aningaasaliissutaasullu nunarput tamakkerlugu silatusaartumik agguataarnissaasa qulakkeerneqarnissaat anguniarneqarpoq. Mittarfiliortiternernut iluarsartuullugit pilersaarutit nuna tamakkerlugu angallannikkut attaveqaatit sunniuteqarfigaat, taamaammallu mittarfiliortiternerit nunarput tamaat eqqarsaatigalugu isigineqartariaqarlutik.

Naalackersuisut naatsorsuutigaat immikkoortunut pilersaarut 2014-imi ukiup affaani siullermi suliarineqareersimassasoq, tamannalu tunngavigalugu Nunatsinni mittarfiit ineriartortinnissaat pillugu tigussaasunik aalajangiisoqarumaarpoq.

Taamaammat nuna tamakkerlugu mittarfeqarnermut immikkoortunut pilersaarut piareeripat Tasiilami mittarfissamut misissueqqaarnissat aamma suliassatut pilersaarutaasup allaatigineqarnera (businesscase) aallartinneqassasut Naalackersuisut siunertaraat.

Tamanna tunngavigalugu siunnersuutip itigartitsissutigineqarnissaa Naalackersuisut inassutigaat.